

adirato per haver inteso che l'era intrato dentro senza vederlo, ma poi dissesi l'è intrà è stà soa, la insida, sarà nostra, et feze far gran guardie con tute le galie de note per non insir dita gallia, credendo dovesse insir de note, et subito che l'armata di Cristoforin li fanno vardie de non insir de note, et lui vedendo mercore de zorno non se ha guarda, *imo* erano sparpagnade el se levò de zorno con bonaza a hore 3 de zorno, che fo a di 4, et dita gallia insite per mezzo le galie, et non li ha trato altro, salvo el capitano una artelaria. Et ditta gallia passò de qui questa note, va con letere a Otranto et da Otranto a Messina. Dize che a la sua partita de Napoli era il marchese de la Tripalda et feva fanti et *etiam* a Messina se sunavano fanti, et haveano retenute le nave a Napoli fino zonzeno le galie cesaree sora le aque de Coron. Et più dize che sopra Cao Passero, a li 27 dil passato dize che andava a forza a la spiazza per far aqua, et vete alcune fuste et galie, le qual galie credo siano quele si dice esser stà prese sopra el Sasno, et iudicase che sia el capitano dil Golfo et la gallia bastarda; che Dio non voia.

136¹) Fu posto, per sier Zuan Vetur Contarini et sier Carlo Zane savi ai Ordeni, che altri dil suo ordine non erano in Pregadi: che atento sia necessario navigar le galle de Alexandria, pertanto li patroni de quele siano ubligati da mò 4 zorni haver fato i loro depositi soto pena de ducati 500, et di esser incantà le galie a suo danno; li qual ducati 500 di la pena siano donati a chi torano le dite galie, non havendo loro fato li depositi.

Et fu fato lezer la scrittura de diti patroni, che iustificano non essere ubligati per non esserli stà dato le galie al tempo, et non è da mandar le galie adesso per non esser specie, come ha referito in Collegio sier Polo Bembo stato consolo in Alexandria per tre anni, reteniva le galie et le nave francese harà levate le specie, sichè per iustitia se dia tuor le galie da dosso de loro.

Et sier Lorenzo Falier andò in renga come partecipe de una gallia, dicendo le raxon di patroni, *ut supra*.

Et li rispose sier Zuan Vetur Contarini savio ai Ordeni meglio che l' sapè, et fe' lezer galie de Alexandria partide el mexe de avosto, sichè haverano le galie, poi el signor Turco che ha fato mandato el comandamento niun tráfegi, nè contrati fino non sarà spazà le nostre galie, vedendo non andar nave,

che tutte se mandano per formenti. Et parlò per la parte ben, nè più ha parlato in Pregadi.

Da poi el Serenissimo se levò laudando quello ha dito el savio ai Ordeni, et dicendo haversi visto de gran perturbation che tutti de Collegio concluso navigasseno et *tamen* hozi solo do savi ai Ordeni, dei qual è il suo officio de far navigar le galie, et li compagni non è venuti in Pregadi; et parlò sopra el navigar, pregando el Conseio per ben dil publico se prendesse la parte se li darà le galie, loro è stà causa non sia sollicità a compirle, con altre parole.

Da poi tornò *iterum* in renga ditto sier Lorenzo Falier, et disse le sue raxon meglio che l' potè; et che non si pol meter questa parte, perchè la pena di ducati 500 è su l' incanto, dicendo una scarpa soa non è bastante al Serenissimo, fo *lappus lingue*, et parlò perchè non se prendesse la parte. Et mandati fuora li parenti de sier Stefano Malipiero, di sier Alvise et sier Marco Morexini di sier Vetur. Andò la parte: 22 non sincere, 51 di no, 76 di la parte. Fu presa.

Et sier Antonio Bembo proveditor sora la mercadantia andò per meter la sua parte contra li cittadini fati, e non have tempo.

Proveditor sora le fabriche de Legnago, per scurtinio.

Sier Beneto Griti el XL Criminal, qu.	
sier Zuane	85. 84
Sier Zuan Boldù el cao di XL, di sier	
Piero	91. 85
Sier Polo Zane el XL Criminal, di sier	
Bernardin	89. 83
Sier Hironimo Bragadin el XL Criminal, qu. sier Zuan Francesco.	72. 93
Sier Marco Antonio Manolesso el XL Criminal, qu. sier Francesco.	80. 94
Sier Maffio Girardo el XL criminal, qu. sier Zuan Mattio	98. 75
Sier Hironimo Valier di sier Beneto, qu. sier Zuane	66. 105
Sier Piero Pasqualigo fo cao di XL, qu. sier Antonio	99. 72
Sier Francesco Venier el XL Criminal, di sier Pellegrin.	78. 93
Sier Lunardo Sanudo è dil Conseio di XXX, qu. sier Lunardo	56. 114
Sier Piero Marzello fo XL Zivil, qu. sier Piero da santa Marina	105. 66

(4) La carta 135¹ è bianca.